

四庫全書

子部

欽定四庫全書

冊府元龜卷九百五十八 宋 王欽若等 撰

外臣部

國邑第二

康居國王冬治樂越慝地

樂音來  
谷切

到卑闐城

闐音徒  
干切

去

長安萬二千三百里不屬都護至樂越慝地馬行七日

至王夏所居蕃內九千一百四里

王每冬寒夏暑則  
徙別居不一處

戶

十一萬口六十萬勝兵十二萬人東至都護治所五千

五百五十里西北可二千里有奄蔡國控弦者十餘萬

大與康居同俗臨大澤無崖蓋北海云康居有小王五

蘇難王治蘇難城

蘇音下  
戒切

去都護五千七百七十六里

去陽關八千二十五里附墨王治附墨城去都護五二

七百六十七里去陽關八千二十五里窳匿王

窳音  
庚

治

窳匿城去都護五千二百六十六里去陽關七千五百

二十五里屬王治屬城去都護六千二百九十六里去

陽關八千五百五十五里奧鞬王

奧音預於去切  
鞬音鈴居言切

治奧

鞬城去都護六千九百六里去陽關八千三百五十五里九五王屬康居後名康國云其國先居張掖祁連山為突厥所破南依蔥嶺遂有其地

奄蔡在康居西北可二千里控弦者十餘萬臨大澤無崖蓋乃北海云後名粟特國在蔥嶺西居於大澤去代一萬六千里

嚴國在奄蔡北屬康居

栗弋國屬康居

大宛國在匈奴西南在漢正西去漢可萬里王治貴山城去長安萬二千五百五十里戶六萬口三十萬勝兵六萬人副王輔國主各一人東至都護治所四千三十一里北至康居卑闐城千五百一十里西南至大月氏六百九十里北與康居南與大月氏接去雒陽萬三千三百五十里

大夏在大宛西南二千餘里媯水南民多可百餘萬

桃槐音回國去長安萬一千八百里戶七百口五千勝兵千

人

休循國王治烏飛谷在慈嶺西去長安萬二百一十里  
戶三百五十八口千三十勝兵四百八十人東至都護  
治所三千一百二十一里至捐毒衍敦谷二百六十里  
西北至大宛國九百二十里西至大月氏千六百一十  
里

捐毒國王治衍敦谷去長安九千八百六十里戶三百  
八十口千一百勝兵五百人東至都護治所一千八百

六十一里至䟽勒南與葱嶺屬

屬聯也音之欲切

無人民西上

葱嶺則休循也西北至大宛千三十里北與烏孫接後

漢時名天竺一名身毒在月氏之東南數千里從月氏

高附國以西南至西海東至盤起國皆身毒之地身毒

有列城數百城置長列國數十國置王雖各小異俱以

身毒為名一說在葱嶺之南地方三萬里其中分為五

天竺其一曰中天竺二曰東天竺三曰南天竺四曰西

天竺五曰北天竺各數千里城邑數百南天竺南際大

海北天竺北拒雪山周回有山為壁南面一谷通為國門東天竺東際大海與扶南林邑隣接但隔小海而已西天竺與屬賓波斯相接中天竺據四天竺之間國並有王又有列國百餘置王雖各有異而俱以天竺為名北臨禪連河一說去代三萬一千五百里一說中天竺以上都城周迴七十餘里

莎車國王治莎車城去長安九千九百五十里戶二千三百三十九口萬六千三百七十三勝兵三千四十九



人輔國侯左右將左右騎君備西夜君各一人都尉二人  
譯長四人東北至都護治所四千七百四十六里西  
至疏勒五百六里西南至蒲犁七百四十里西經蒲犁  
無雷至大月氏東去雒陽萬九百五十里東北至疏勒  
疏勒國王治疏勒城去長安九千三百五十里戶千五  
百一十口萬八千六百四十七勝兵二千人疏勒侯擊  
胡輔國侯都尉左右將左右騎君左右譯長各一人東  
至都護治所二千二百一十里南至莎車五百六十里

有市列西當大月氏大宛康居道也其國都城方五里  
國內有大城十二小城數十勝兵二千人

尉頭國王治尉頭谷去長安八千六百五十里戶三百  
口二千三百勝兵八百人左右都尉各一人左右騎君  
各一人東至都護治所千四百一十一里南與疏勒接  
山道不通西至捐毒千三百二十四里逕道馬行二日

烏孫國在大宛東北可二千里行國

言土著

大昆彌治赤

谷城

烏孫於西域諸戎其形最異人云胡人青眼赤鬚狀類彌猴者本其種

去長安八千

九百里戶十二萬口六十三萬勝兵十八萬八千八百人相大祿大將二人侯三人大將都尉各一人大監二人大吏一人舍中大吏二人騎君一人東至都護治所千七百二十一里至康居蕃內地五千里

姑墨國王治南城去長安八千一百五十里戶三千五百口二萬四千五百勝兵四千五百人姑墨侯輔國侯都尉左右將左右騎君各一人譯長二人東至都護治所二千二十一里南至闐馬行十五日北與烏孫接

溫宿國王治溫宿城

今雍州豐泉縣北有溫宿嶺者本前漢時溫宿國人今居北地田牧

因以  
為名

去長安八千三百五十里戶二千二百口八千四

百勝兵千有五百人輔國侯左右將左右都尉左右騎  
君譯長各二人東至都護治所二千三百八十里西至  
尉頭國三百里北至烏孫赤谷六百三十里

龜茲國王治居延城去長安七千四百八十里戶六千  
九百七十口八萬一千三百一十七勝兵二萬一千七  
十六人大都尉丞輔國侯安國侯擊胡侯卻胡侯都尉

擊車師都尉左右將左右都尉左右騎君左右力輔君  
各一人東西南北部千長二人卻胡君三人譯長四人  
南與精絕東南與且末西南與杆彌北與烏孫西與姑  
墨接一說俗有城郭其城三重中有佛塔廟千所王宮  
壯麗煥若神居後秦呂光伐西域龜茲其王出奔光入  
其城城有三重外城與長安城等室屋壯麗飾以琅玕  
金玉光立帛純弟震為王而歸自此中國絕不通一說  
在尉犁西北白山之南一百七十里

烏墨國戶百一十口千二百勝兵三百人城都尉譯長各一人與都護同治其南三百三十里至渠犂

渠犂城都尉一人戶百三十口千四百八十勝兵百五十人東北與尉犂東南與且末南與精絕接西有河至龜茲五百八十里

尉犂國王治尉犂城去長安六千七百五十里戶千二百口九千六百勝兵二千人尉犂侯安世侯左右將左右都尉擊胡君各一人譯長二人西至都護治所三百

里南與鄯善且末接

危須國王治危須城去長安七千二百九十里戶七百  
口四千九百勝兵二千人擊胡侯擊胡都尉左右將左  
右都尉左右騎君擊胡君譯長各一人西至都護治所  
五百里至焉耆百里

焉耆國王治員渠城去長安七千三百里戶四千口三  
萬二千一百勝兵六千人擊胡侯卻胡侯輔國侯左右  
將左右都尉擊胡左右君擊車師君歸義車師君各一

人擊胡都尉擊胡君各二人譯長三人西南至都護治  
所四百里南至尉犁百里北與烏孫接一說其國王居  
南河城北去長史所居八百里四面有大山與龜茲相  
連道險阨易守有海水曲入四山之內周匝其城三十  
餘里白山之南七十里漢時舊國也都城方二里國內  
有九城勝兵千餘人南有黃河西帶葱嶺東去龜茲千  
五百里西去鎔汗國千里南去朱俱波八九百里東北  
去突厥方千餘里東南去瓜州四千六百里



烏貪訾離國王治于婁谷去長安萬三百三十里戶四

十一口二百三十一勝兵五十七人輔國左右都尉各

一人東與單桓南與且彌西與烏孫接

且音子  
余切

卑陸國王治天山東乾當國

乾音  
干

去長安八千六百八

十里戶二百二十七口千三百八十七勝兵四百二十

二人輔國侯左右將左右都尉左右譯長各一人西南

至都護治所千二百八十七里

卑陸後國王治番渠類谷

番音  
盤

去長安八千七百一十

里戶百六十二口千一百三十七勝兵三百五十人輔國侯都尉譚長各一人將二人東與郁立師北與匈奴西與劫國南與車師接

郁立師國王治內吐谷

出音丁忽切

去長安八千八百三十

里戶百九十口千四百四十五勝兵三百三十一人輔國侯左右都尉譚長各一人東與車師城長西與卑陸北與匈奴接

單桓國王治單桓城去長安八千八百七十里戶二十

七口百九十四勝兵四十五人輔國侯將左右都尉譯  
長各一人

蒲類國王治天山西䟽榆谷去長安八千三百六十里  
戶三百二十五口二千三十二勝兵七百九十九人輔  
國侯左右將左右都尉各一人西南至都護治所千三  
百八十七里

蒲類後國王去長安八千六百三十里戶百口千七十  
勝兵三百三十四人輔國侯將左右都尉譯長各一人

一說居天山西䟽榆谷東南去長史所居千二百九十里

移支國居蒲類地戶千餘口三千餘勝兵千餘人

劫國王治天山東丹渠谷去長安八千五百七十里戶九十五口五百勝兵百一十五人輔國侯都尉譯長各一人西南至都護治所千四百八十七里

西且彌國王治天山東于大谷

且音子  
余切

去長安八千六

百七十里戶三百三十二口千九百二十六勝兵七百

三十八人西且彌侯左右將左右騎君各一人西南至都護治所千四百八十七里

東且彌國王治天山東允虛谷去長安八千二百五十里戶百九十一口千九百四十八勝兵五百七十二人東且彌侯左右都尉各一人西南至都護治所千五百八十七里東去長史所居八百里

狐胡國王治車師柳谷去長安八千二百里戶五十五口二百六十四勝兵四十五人輔國侯左右都尉各一

人西至都護治所千一百四十七里至焉耆七百七十里

山國去長安七千一百七十里

常在山下居不為城治也

戶四百五

十口五千勝兵千人輔國侯左右將左右都尉譯長各一人西至尉犁一百四十里西北至焉耆百六十里西至危須二百六十里東南與鄯善且末接

車師前王國治交河城河水分流繞城下故號交河去長安八千一百五十里戶七百口六千五十勝兵千八

百六十五人輔國侯安國侯左右將都尉歸漢都尉車  
師君通善君鄉善君各一人譯長二人西南至都護治  
所千八百七里至焉耆八百三十五里交河城去長史  
所居柳中八十里

車師後王國治務塗谷去長安八千九百五十里戶五  
百九十五口四千七百七十四勝兵千八百九十人擊  
胡侯左右將左右都尉道民君譯長各一人道讀西南  
至都護治所千二百三十七里去長史所居五百里

車師都尉國戶四十口三百三十三勝兵八十四人  
車師後長城國戶百五十五口九百六十勝兵二百六  
十人

大秦國一名犁鞞以在海西亦云海西國地方數千里  
有四百餘城小國役屬者數十以石為城郭列置郵亭

皆堊墍之

堊飾也音火既切  
堊白土也音惡

所居城邑周圍百餘里城

中有五宮相去各十里宮室皆以水精為柱食器亦然  
或云其國西有弱水流沙近西王母所居處幾於日所



入也從條支西行二百餘里近日所入則與今書異矣  
前世漢使皆自烏弋以還莫有至條支者也又云從安  
息陸道繞海北行出海西至大秦人庶連屬十里一亭  
三十里一置置驛也其城周迴百餘里居宇皆以珊瑚為  
椽柄琉璃為牆壁水晶為柱礎其王有五宮其宮相去  
各十里每旦於一宮聽事終而復始

小人國在大秦之南

澤散國屬大秦其地在海中央北至驢分水行半歲風

疾時一月到最與安息安谷城相近西南至大秦都  
知里數

驢分王屬大秦其治去大秦都二千里從驢分城西之  
大秦渡海飛橋長二百三十里渡海道西南行繞海直  
西行

且蘭王屬大秦從思陶國直南渡河乃直西行之且蘭  
三千里道出河南乃西行

賢督王屬大秦其治東北西北去汜復六百里

氾復王屬大秦其治東北去於羅三百四十里渡海也  
於羅屬大秦其治在氾復東北渡河從於羅東北又渡  
河斯羅東北又渡河

斯羅國屬安息與大秦接也

北烏伊別國在康居北

呼得國在葱嶺北烏孫西北康居東北勝兵萬餘人

堅昆國在康居西北勝兵三萬人

滑國車師別種也後漢初居代都滑為小國屬蠕蠕後

稍強大征其旁國開地千餘里

白題國在滑國東去滑六日行西極波斯

師子國天竺旁國也舊無人民止有鬼神及龍蛇居之  
諸國商賈來共市易鬼神不見其形但出珍寶諸國聞  
其土樂因此競至遂成大國

東離國居沙竒城在天竺東南三千餘里大國也列城  
數十皆稱王

安國漢安息之地都在那密水南城有五重環以流水

國西百餘里有異國

波斯國都達曷水西蘇蘭城即條支故地也有城周迴三十二里城高四丈皆有樓觀城內屋宇數百千間城外佛寺二三百所東與滑國西及南俱與婆羅門北與汎慄國接西去海數百里東去穆國四千餘里西北去拂林四千五百里東去瓜州一萬六千七百里一說都宿利城在忸密南古條支國也去代地二萬四千二百二十八里城方十里戶十餘萬

伏盧尼國都城在波斯國北去代二萬七千三百二十里累石為城

大食國本在波斯國之西後衆漸盛遂割據波斯西境自立為王西隣於大海有勝兵四十餘萬

穆國都烏澹河之西安息故地都城方三里勝兵二千人東北去安國五百里東去烏那遏二百餘里西波斯國四千餘里東去瓜州七千七百里

烏那遏國都烏澹水西舊安息之地都城方二里勝兵

數百人王坐金羊座東北去安國四百里西北去穆國二百餘里東去瓜州七千五百里

米國都那密水西舊康居之地都城方二里勝兵數百人西北去康國百里東去蘇對沙那國五百里西南去史國二百里東去瓜州六千四百里

曹國都那密水南數里舊是康居之地都城方三里勝兵千餘人

何國都那密水南數里舊是康居之地東去曹國百五

十里西去小安國三百里東去瓜州六千七百五十里  
史國都獨莫水南十里舊康居之地也都城方二里勝  
兵千餘人北去康國二百四十里南去吐火羅五百里  
西去那色波國二百里東北去米國二百里東去瓜州  
六千五百里

石國居於藥殺水都城方十餘里國城之東南立屋置  
座於中其國南去鏐汗六百里東南去瓜州六千里

鏐汗國在葱嶺之西五百里古渠搜國也都城方四里



勝兵千人東去疏勒千里西去蘇對沙那國五百里西  
北去石國五百里東去突厥可汗二千餘里東去瓜州  
五千五百里

挹怛國都烏澣水南二百餘里勝兵者五六千人都城  
方十餘里多寺塔

吐火羅國都葱嶺西五百里與悒怛雜居都城方二里  
勝兵者十萬人一說其北界即漢西域大宛之地今屬  
西蕃突厥在瓜州西六千七百里

俱蘭國與吐火羅接南抵雪山唐貞觀中朝貢

女國在蔥嶺之南山上為城方五六里人有萬家其國以女為王侍女數百人五日一聽朝復有小女王共知國政

東女國西羗之別種以西海中復有女國故稱東女焉俗以女為王東與茂州党項接東南與雅州接隔羅女蠻及白狼夷其境東西九日行南北二十日行有大小八十餘城王所居康延川中有弱水南流用牛皮為船

以渡戶四萬餘衆勝兵萬餘人散在山谷間

吐谷渾晉時據有西零巴西甘松之界極乎白蘭數千里然有城郭而不居隨居水草廬帳為屋當魏周之時始稱可汗都伏侯城在青海西十五里其地兼鄯善且末西北有流沙數百里

河南國在益州西北亘數千里其南界龍涸城去成都千餘里大戍有四一在清水川一在赤水一在澆河一在吐屈直川皆子弟所治一說其地則張掖之南隴西之

西在河之南故以為號其界東至疊川西隣于闐北接高昌東北通秦嶺方千餘里蓋古之流沙地焉

高昌國南接河東連燉煌西次龜茲北隣勃勒置四十六鎮交河田地高寧臨川橫截柳婆濬林新興繇寧始昌篤進白刀等皆具鎮名其地東西三百里南北五百

里國內總有城一十六一云有八城其國去燉煌十三日行

其四面多大山其都城週迴一千八百四十步於坐室畫魯哀公問政於孔子之像四面多大山以其地勢高

敵人庶昌盛故名高昌一說即漢車師前王之庭西域  
長史戊巳校尉之故地也其國東西二百延袤數百里  
漢興師西討軍中羸憊者留居焉地形高敞因名高昌  
壘有八城本皆中國人也

葱茈羌

茈音紫

北與諸國接不知其道理廣狹南與白馬

羗隣白馬氏秦漢以來世居岐隴以南漢川以西自立  
豪帥自汧渭抵於巴蜀或謂之白氏或謂之故氏漢末  
徙居仇池地方百頃魏封百項王晉封仇池公

白蘭國羌之別種也其地東北接吐谷渾西毗利模徙南界那鄂

党項羌其種有宕昌白銀狼東接臨洮西拒葉護南北數千里處山谷間每姓別為部落大者五千餘騎小者千餘騎

武興國本仇池地其國東連秦嶺西接宕昌去宕昌八百里南去漢中四百里北去岐州三百里去長安九百里

宕昌國其界自仇池以西東西千里帶水以南南北八百里地多山阜部衆二萬餘落

鄧至國居涼州界羗別種也

湟中月氏國舊在張掖酒泉地大月氏為匈奴冒頓所殺餘種分散踰葱嶺其羸弱者入山依諸羗居止者舌國故康居國也在破落那西北去代一萬五千四百五十里

丁令在康居北勝兵六萬人隨畜牧依處西南去康居

五千里

短人國在康居西北人衆甚多去奄蔡諸國甚遠去康居萬餘里

悅般國在烏孫西北去代一萬九百三十里其先匈奴北單于部落也為漢車騎將軍竇憲所逐北單于度金山西走康居其羸弱不能去者住龜茲北地方數千里衆可二十餘萬涼州人猶謂之單于王

陀羅伊羅國在烏蔡國北天雪山坡上緣梯登山接七



百梯方到其國

阿鈎羗在莎車西南國西有縣度山其間四百里中往往有棧道下臨不測之深人行者以繩索相持而度

波路國在阿鈎羗西北去代一萬三千九百里

三童國在軒渠國西南千里

蒲山國故皮山國也居皮城在于闐南去代一萬二千里其國西南三里有凍凌山後役屬于闐

悉居半國故西夜國也

一名于合

在于闐西去代萬一千九

百七十里

權於摩國故烏托國也其王治烏托城西接悉居半國西南去代一萬二千九百七十里

洛那國故大宛國也都貴山城在踈勒西北去代四千四百五十里

朱居國在于闐西役屬噉噉

噉噉國其原出於塞北自金山而南在于闐之西都烏澗水南二百餘里去長安一萬一百里其王都拔底延

城蓋王舍城也其城方十里餘多寺塔衆可十萬無城邑西域康居于闐安息及諸小國三十許皆役屬之號為大國

烏菴國在賒彌南北有慈嶺南至天竺婆羅門胡

乾陀國在烏菴西本名葉波為嚧達所破因改焉所都城東南七里有佛塔高七十丈周三百步即所謂雀離佛國也

渴盤陁國在慈嶺東于闐西小國也西隣滑國南接屬

賓國北連䟽勒國所治在山谷中城周迴十餘里國有  
十二城

波知國在鉢和西南土狹人貧依託山谷

賒彌國在波知之南山居亦附巖躡東有鉢勒盧國路  
險緣鐵鑠而度下不見底

越延底國治辛頭河北西北去賒彌國千餘里東北至  
瓜州五千四百里

耆至拔國在䟽勒西去代一萬一千六百二十里其國

東有潘賀那山

悉密國在者至拔西去代萬二千一百里其國東有山名郁悉滿山

悉萬斤國在悉密西去代一萬二千二百二十里其國有山名伽色那山

伽不單國在悉萬斤西北去代一萬二千七百八十里色知顯國在悉萬斤西北去代一萬二千九百四十里吐呼羅國去代一萬二千里東至范陽國西至悉萬斤

國中問相去二千里南至連山不知名北至波斯國中  
間相去一萬里中薄提城周迴六十里城南有西流大  
水名漢樓河

伽色尼國在悉萬斤南去代一萬二千五百里

薄知國在伽色尼南去代一萬三千三百三十里

忸密國在悉萬斤西去代二萬二千八百二十八里

牟知國在忸密西南去代二萬二千九百二十里

阿弗大汗國在忸密西去代二萬三千七百二十里

諾色波羅國在忸密南去代二萬三千四百二十八里  
畢伽至國東接忸密國去代二萬三千七百二十八里  
呼似密國在阿弗大汗西去代二萬二百里

副貨國去代一萬七千里東至阿富汗使且國西至役誰  
國中問相去一千里南有連山不知名北至奇沙國相  
去一千五百里國中有副貨城周匝七十里

疊伏羅國去代三萬一千里國中有勿悉城城北有疆  
奇水西流焉

鉢和國在渴槃陀西其土尤寒有大雪山望若銀峯  
拔豆國去代五萬一千里東至多向勿當國西至旃那  
國中間相去七百里南至屬陵伽北至弗那伏且國中  
間相去九百里

吐蕃在長安之西八千里本漢西羌地也後魏神瑞初  
南涼禿髮樊尼率衆西奔濟黃河逾積石於羌中建國  
開地千里以禿髮為國號語訛謂之吐蕃其後子孫繁  
昌又侵伐不息土宇漸廣唐高宗時吐蕃盡收羊同党



項及諸羗之地東與涼松茂雋等州相接南至婆羅門西又攻陷龜茲踈勒四鎮北抵突厥地方萬餘里自漢魏以來西戎之盛未之有也

大羊同國東接吐蕃西接小羊同北直于闐東西千餘里勝兵八九萬

悉立國在吐蕃西南戶五萬餘有城邑村落依谿澗章求拔國在悉立西南居四山之內後移出山西地接東天竺遂改衣服變西羗之俗因而附焉其地延袤八

九百里勝兵二千餘人居無城郭

回紇之先匈奴之裔也後魏時號為鐵勒部落其衆微  
小依託高車臣屬突厥隋時謂之特勒在薛延陀北境  
居婆陵水側去長安六千九百里隨逐水草勝兵五萬  
人口十萬唐貞觀中以回紇部為瀚海府開元中漸盛  
保烏德健山南去西城千七百里西城即漢之高闕塞  
也西城北去磧石三百里有十一都督元和可汗遣  
使改為回鶻義取回旋輕捷如鶻也

骨利幹居回紇瀚海之北俟斤同居勝兵四千五百口  
萬餘人

都蕃鐵勒之別種南去迴紇十三日行前代未通也  
結骨部其地在回紇西北三千里勝兵八萬口數十萬  
其國南阻貪湯漫山山多林木夏浸如冬積雪往來險  
阻有水從回紇北流踰山經其國

多濫葛在薛延陀東界居近同羅水兵一萬口三萬人  
僕骨在多濫葛東境勝兵一萬口三萬人

拔野古在僕骨東勝兵一萬口六萬人

北狄匈奴漢高帝時冒頓單于最強大盡服從北夷而南與諸夏為敵國置左右賢王左右谷蠡音鹿黎左右大

將左右大都尉左右大當戶左右骨都侯自左右賢王以下至當戶大者萬餘騎小者數千人諸左王將居東

方直上谷以東直當也接濊狍朝鮮右王將居西方直上

郡以西接氐羌而單于庭直代雲中各有分地逐水草移徙至後漢光武時始有南北二庭焉

烏桓者本東胡也漢初匈奴冒頓滅其國餘類保烏桓山因以為號武帝遣驃騎大將軍霍去病擊破匈奴左地因徙烏桓于上谷漁陽右北平遼東五郡塞外為漢偵察匈奴動靜後漢靈帝初烏桓大人上谷有難樓者衆九千餘落遼西有丘力居者衆五千餘落皆自稱王又遼東蘇僕延衆千餘落自稱峭王右北平烏延衆八百餘落自稱汗魯王

鮮卑東胡之支也別依鮮卑山故因為號後漢和帝時

右校尉耿夔擊破匈奴北單于逃走鮮卑因此轉徙據其地匈奴餘種留者尚有十餘萬落皆自號鮮卑其地東接遼水西當西域

突厥者蓋匈奴之別種居金山之陽金山形似兜黎其俗謂兜黎為突厥因以為號一說突厥之先平涼雜胡也西魏廢帝時木可汗俟升西破嚙噠東走契丹北并契骨威服塞外諸國其地東自遼海以西西至西海萬里南自沙漠以北北至北海五六千里皆屬焉西突厥

本與北突厥同祖初木杆與沙鉢畧可汗有隙因分為二其國即烏孫故地東至突厥國西至雷翥海南至疏勒北至瀚海在長安北七千里自焉耆國西北七日行至其南庭又正北八日行至其北庭鐵勒龜茲及西域諸胡皆歸附之一說沙鉢羅葉護可汗既立建庭於睢合水北謂之水南庭東以伊列河為界

契丹國居黃水之南黃龍之北數百里後魏時為高麗所侵部落萬餘口求內附止於白狼河其後為突厥

所逼又以萬家寄於高麗隋開皇中背高麗率衆內附  
高祖安置於渴奚那頡之北部落漸衆遂北徙逐水草  
當遼西正北二百里依託訖臣水而居東西亘五百里  
南北三百里分為十部兵多者三千少者千餘其南者  
為契丹在北者號室韋一說其國在鮮卑之東故地距  
高麗西至奚北隣靺鞨南接營州延袤二千里勝兵萬  
餘人分為八部又云古匈奴之種代居遼澤之中潢水  
南崖南距渝與榆同關千一百里渝關南距幽州七百里



本鮮卑之舊地也後唐天祐末其酋阿保機乃僭稱皇帝署中國官號為城郭宮室之制於漠北距幽州三千里名其邑曰西樓邑屋門皆東向如車帳之法城南別作一城以實漢人名曰漢城

南室韋在契丹北三千里分為二十五部每部有餘莫弗瞞吐猶酋長也

北室韋在南室韋北行十一日其國分為九部落繞吐紇山而居其部落渠帥號乞引莫賀吐每部有莫何弗

三人以貳之

鉢室韋在北室韋北千里依胡布山而住人衆多北室  
韋不知為幾部落

穴室韋在鉢室韋西北數千里

冊府元龜卷九百五十八

欽定四庫全書

冊府元龜卷九百五十九 宋 王欽若等 撰

外臣部

土風

夫五方之民言語不通衣服殊制至於居處飲食固亦  
異宜寒燠氣候諒非一貫是故先王設象胥之官以掌  
其鞮譯命輜軒之使分采於方言聲教之所暨羈縻而  
弗絕若乃藁街之攸舍秘閣之所記參考乎殊俗增廣

乎異聞稽之載籍灼然惟叙詮次其說以著於篇將使  
彊戎索者軌制可徵納職貢者名物斯辨庶以叅司籍  
之記備有司之傳云

東夷夫餘國其民土著有宮室倉庫牢獄多山陵廣澤  
於東夷之域最平敞土地宜五穀不生五果其人麤大  
性強勇謹厚不寇鈔食飲皆用俎豆會同拜爵洗爵揖  
讓升降以殷正月祭天國中大會連日飲食歌舞名曰  
迎鼓於是時斷刑獄解囚徒在國衣尚白白布大袂袍

袴履革鞜出國則尚繒繡錦罽大人加狐狸狃白黑貂  
之裘以金銀飾帽譯人傳辭皆跪手據地竊語用刑嚴  
急殺人者死沒其家人為奴婢竊盜一責十二男女淫  
婦人妬皆殺之尤憎妬已殺尸之國南山上至腐爛女  
家欲得輸牛馬乃與之兄死妻嫂與匈奴同俗其國善  
犧牲出名馬赤玉貂狃美珠珠大者如酸棗以弓矢刀  
矛為兵家家自有鎧仗國之耆老自說古之亡人作城  
柵皆員有似牢獄行道晝夜無老幼皆歌通日聲不絕

有軍事亦祭天殺牛觀蹄以占吉凶蹄解者為凶合者

為吉有敵諸加

加官號也

自戰下戶俱擔糧飲食之其死夏

月皆用冰殺人狗葬多者百餘厚葬有棺無槨其俗停

喪五月以久為榮其祭亡者有生有熟喪主不欲速而

他人強之嘗諍引以此為節其居喪男女皆純白婦人

著布面衣去環佩大體與中國皆倣佛也水旱不調五

穀不熟輒歸咎於王或言其王葬用玉匣漢朝常豫

以玉匣付玄菟郡王死則迎取以葬公孫淵伏誅玄菟

庫猶有玉匣一具今夫餘庫

今魏時也

有玉璧珪瓚數代之

物傳世以為寶者老言先代之所賜也其國殷富自先  
世以來未嘗破壞也其印文言濊王之印國有故城名  
濊城蓋本濊貊之地而夫餘王其中自謂亡人抑有似  
也

肅慎國夏則巢居冬則穴處父子世為君長無文墨以  
言語為約有馬不乘但以為財產而已無牛羊多畜豬  
食其肉衣其皮績毛以為布有樹名雜常若中國有聖



帝代立則其木生皮可衣無井竈作瓦鬲受四五升以食坐則箕踞以足挾肉而啖之得凍肉坐其上令煖土無鹽鐵燒木作灰灌取汁而食之俗皆編髮以布作襜徑尺餘以蔽前後將嫁娶男以毛羽插女頭女和則持歸然後致禮聘之婦貞而女淫貴壯而賤老死者其日即葬之於野交木作小槲殺猪積其上以為死者之糧性凶悍以無憂哀相尚父母死男子不哭泣哭者謂之不壯相盜竊無多少皆殺之故雖野處而不相犯

挹婁古肅慎之國

在夫餘東北千餘里

土地多山險人形似夫餘

而言語各異有五穀麻布出赤玉好貂無君長其邑落各有大人處於山林之間土氣極寒常為穴居以深為貴大家至接九梯好養豬食其肉衣其皮冬以豕膏塗身厚數分以禦風寒夏則裸袒以尺布蔽其前後其人臭穢不潔作廁於中園之而居自漢興以後臣屬夫餘種衆雖少而多勇力處山險又善射發能入人目弓長四尺力如弩矢用楛長一尺八寸青石為鏃鏃能施毒

中人即死便乘船好寇盜鄰國畏患而卒不能服東夷  
夫餘飲食類此皆用俎豆惟挹婁獨無法俗最無綱紀

高句驪

漢玄菟郡也  
在遼東之東

地方二千里多大山深谷人隨而

為居少田業力作不足以自資故其俗節於飲食而好  
修宮室東夷相傳以為夫餘別種故言語法則多同其  
俗淫皆潔淨自喜暮夜輒男女羣聚為倡樂好祠鬼神  
社稷零星以十月祭天大會名曰東明其國東有大穴  
號隧神穴亦以十月迎而祭之其公會衣服皆錦綉金

銀以自飾大加主簿皆著幘如冠幘而無後其小加著折風形如弁無牢獄有罪諸加評議便殺之没入妻子為奴婢其婚姻皆就女家生子長大然後將婦歸家其俗男女已嫁娶便稍營送終之具金銀財幣盡於厚葬積石為封列種松柏其人性凶急有氣力習戰鬪好寇鈔沃沮東濊皆屬焉每春秋較獵王親臨之人稅布五疋穀五石遊人則三年一稅十人共細布一疋租戶一石次七斗下五斗反逆者縛之於柱斮而斬之籍没

其家盜則償十倍用刑既峻罕有犯者樂有五絃琴箏  
篳篥橫吹簫鼓之屬吹蘆以和曲每年初聚戲於涓水  
之上王乘腰輦列羽儀以觀之事畢王以衣服入水分  
左右為二部以水石相濺擲誼呼馳逐再三而止俗以  
趨走為敬拜則曳一脚立多反拱行必搖手性多詭伏  
父子同川而浴共室而寢婦人淫奔俗多遊女有婚嫁  
者取男女相悅然後為之男家送猪酒而已無財聘之  
禮或有受財者人共恥之死者殯於屋內經三年擇吉

日而葬居父母及夫之喪服皆三年兄弟三月初終哭  
泣葬則鼓舞作樂以送之埋訖悉取死者生時服翫車  
馬置於墓側會葬者爭取而去敬鬼神多淫祠盜者倍  
徵贓若貧下不能備及負公私債者皆聽評其子女為  
奴婢以償之丈夫衣同袖衫大口袴白韋帶黃革履其  
冠曰骨蘇多以紫羅為之雜以金銀為飾其有官品者  
又插二鳥羽於其頭工以顯異之婦人服裙襦袖皆為  
襪書籍有五經三史三國志晉春秋兵器有甲弩弓箭

鞍稍矛鋌句驪

一名緬耳一名小水貂在遼東郡西安平縣北

出好弓所謂貂

弓也

東沃沮國在高句驪蓋馬大山之東土肥美背山向海  
宜五穀善田種有邑落長帥人性質直彊勇少牛馬便  
持矛步戰言語飲食居處衣服禮節有似句驪其嫁娶  
之法女年十歲已相設許婿家迎之長養以為婦至成  
人便還女家女家責錢錢畢乃復還婿家其葬作大木  
槨長十餘丈開一頭作戶新死者皆假埋之方使覆形

皮肉盡乃取骨置槨中舉家皆共一槨刻木如生形隨死者為數又有瓦甕置米其中編縣之於槨戶邊

北沃沮其俗皆與南同

北沃沮一名置溝婁

濊國本朝鮮地箕子教以禮義田蠶又制八條之國其人終不相盜無門戶之閉婦人貞信飲食以籩豆自謂與句驪同種言語法俗大抵相類其人性愿慤少嗜欲不請勾男女皆衣曲領其俗重山川山川各有部分界不得妄相干涉同姓不婚多所忌諱疾病死亡輒捐棄



舊宅更造新居知種麻養蠶作絲繇布曉候星宿豫知  
年歲豐約常用十月祭天晝夜飲酒歌舞名之為舞天  
又祠虎以為神邑落有相侵犯者輒相罰責生口牛馬  
名之為責禍殺人者償死少寇盜能步戰作矛長二丈  
或數人共持之樂浪擅弓出其地又多文豹有果下馬  
高三尺乘之可  
於果樹下行海出班魚使來皆獻之

馬韓國韓種有三一曰馬韓二曰辰韓三曰弁韓馬韓  
北與樂浪南與倭接東西以海為限人知田蠶作綿布

出大栗如梨有長尾雞尾長五尺邑落雜居亦無城郭  
作土室形如冢開戶在上不知拜跪無長幼男女之別  
不貴金寶錦罽不知騎乘牛馬雅重瓔珠以綴衣為飾

及縣頸垂耳大率皆魁頭露紒

魁頭猶科頭也謂以髮  
縈繞成科結也紒音計

布袍草履其人壯勇少年有築室作力者輒以繩貫脊  
皮緹以大木嚙呼為健常以五月田竟祭鬼神晝夜酒  
會羣聚歌舞舞輒數十人相隨蹋地為節十月農功畢  
亦復如之諸國邑各以一人主祭天神號為天君又立

蘇塗

諸國各有別邑為蘇塗諸亡逃至其中皆不還之蘇塗之義有似浮屠

建大木以縣

鈴鼓事鬼神其南界近倭亦有文身者又其俗好衣幘下戶詣郡朝謁皆假衣幘自服印綬衣幘千有餘人

辰韓在馬韓之東言語有類秦人繇是或謂之秦韓其土地肥美宜種五穀及稻曉蠶桑作縑布乘駕牛馬嫁娶禮俗男女有別以大鳥羽送死其意欲使死者飛揚其國作屋橫累之木為之有似牢獄也國出鐵韓濊倭皆從取之諸市買皆用鐵如中國用錢又以供給二郡

俗喜歌舞飲酒有瑟其形似筑彈之亦有音曲生兒便以石壓其頭欲令其褊今辰韓人皆褊頭男女近倭亦文身便步戰兵仗與馬韓同其俗行者相逢皆住讓路弁辰國與辰韓雜居亦有城郭衣服居處與辰韓同言語法俗亦相似祠祭鬼神有異施竈皆在戶西其瀆盧國與倭國接界十二國亦有王其人形皆長大美髮亦作廣幅細布衣服潔清而刑法嚴峻其國近倭故頗有文身者

州胡國在馬韓之西海島上其人短小髡頭衣韋衣有  
上無下好養牛豕乘船往來貨市韓中

倭國

在韓東南大海  
中依山島為居

男子無大小皆黥面文身自古以

來其使詣中國皆自稱大夫夏后少康之子封於會稽  
斷髮文身以避蛟龍之害今倭水人好沈沒捕魚蛤文  
身亦以厭大魚水禽後稍以為飾諸國文身各異或左  
或右或大或小尊卑有差計其道里當在會稽東冶之  
東其風俗不淫男女皆露紒以木絲招頭其衣橫幅但

結束相連略而無縫婦女被髮屈紒作衣如單被穿其  
中央貫頭衣之種禾稻紵麻蠶桑紡績出細紵縑絲其  
地無牛羊馬虎豹鵲兵用矛楯木弓弓形短下長上竹  
箭或鐵鏃或骨鏃所有無與儋耳朱崖同地溫暖冬夏  
食生菜皆徒跣有屋室父母兄弟卧息異處以朱丹塗  
其身體如中國用粉也食飲用籩豆手取以食不用匙  
筋其死有棺無槨封土作冢始死停喪十餘日當時不  
食肉喪主哭泣他人就歌舞飲酒已葬舉家詣水中澡

浴以如練沐其行來渡海詣中國常使一人不梳頭不  
去蟣虱衣服垢汙不食肉不近婦人如喪人民名之為  
持衰若行者吉善共顧其生口財物若有疾病遭暴害  
便欲殺之謂之持衰不謹出真珠青玉其山有丹其木  
有柎梓豫章櫟檮投擲烏號楓香其竹篠籜桃支有薑  
橘椒蘘荷不知以為滋味有獼猴黑雉其俗舉事行來  
有所云為輒灼骨而卜以占吉凶先告所卜其辭如今  
龜法視火圻占兆其會同坐起父子男女無別人性嗜

酒其俗不知正歲四節但計春耕秋收為年紀見大人所敬但搏手以當跪拜其人壽考或百年或八九十年國多女大人皆四五婦下戶或二三婦婦人不淫不妬忌不盜竊少爭訟其犯法輕者沒其妻子重者滅其門戶及宗族尊卑各有差序足相臣服收租賦有邸閣國國有市交易有無使大倭監之

夷洲

在臨海南南去郡二千里

地無霜雪草木不死四面是山谿人

皆髡髮穿耳女人不穿耳土地饒沃既生五穀又多魚



肉有大尾短如麕尾狀舅姑子婦卧息共一大牀畧不相避地有銅鐵惟用鹿格為矛以戰鬪摩礪青石以作弓矢取生魚肉雜貯大瓦器中以鹽鹵之歷月餘日乃啖食之以為上饈

文身國

在倭國東北  
七千餘里

人體有文如獸其額上有三文文

大直者貴文小曲者賤土俗歡樂物豐而賤行客不賣糧有屋宇無城郭其王所居飾以金銀珍麗繞屋為塹廣一丈實以水銀雨則流於水銀之上市用珍寶犯輕

罪者則鞭杖犯死罪則置猛獸食之有枉則猛獸避而不食經宿則赦之

大漢國

在文身國東五千餘里

無兵戈不攻戰風俗並與文身國

同而言語異

扶桑國

在大漢國東二萬餘里地在中國之東

其土多扶桑木故以為名

扶桑葉似桐而初生如笋國人食之實如梨而赤績其皮為布以為衣亦以為緜作板屋無城郭有文字以扶桑皮為紙無兵甲不攻戰其國法有南北獄若犯輕者

入南獄重罪者入北獄有赦則赦南獄不赦北獄在北  
獄者男女相配生男八歲為奴生女九歲為婢犯罪之  
身至死不出貴人有罪國乃大會坐罪人於坑對之宴  
飲分訣若死別焉以灰繞之其一重則一身屏退二重  
則及子孫三重者則及七世名國王為乙祁貴人第一  
者為大對盧第二者為小對盧三者為納吐沙國王  
行有鼓角導從其衣色隨年改易甲乙年青丙丁年赤  
戊巳年黃庚辛年白壬癸年黑有牛角甚長以角載物至

勝二十斛有牛車馬車鹿車國人養鹿如中國畜牛以乳為酪有桑梨經年不壞多蒲桃其地無鐵有銅不貴金銀市無租估其婚姻婿往女家門外作屋晨夕灑掃經年而女不悅即驅之相悅乃成婚禮大抵與中國同親喪七日不食祖父母喪五日不食兄弟伯叔姑姊三日不食設靈為神像朝夕拜奠不制纁經嗣王立三年不視國事

百濟國

在帶方故地  
南與倭接

其衣服與高麗畧同婦人不加粉

黛加髻髮垂後出嫁則分為兩道盤於頭上俗尚騎射  
讀書史能吏事亦知醫藥著龜占相之術以兩手據地  
為敬有僧尼多寺塔而無道士有鼓角箜篌箏竿篪笛  
之樂投壺圍碁擲蒲握槊弄珠之戲行宋元嘉歷以建  
寅月為歲首賦稅以布絹麻絲及米等量歲豐儉差等  
輸之其刑法反叛退軍及殺人者斬盜者流其贓兩倍  
徵之婦人犯姦者没入夫家為婢婚娶之禮畧同於華  
父母及夫死者三年治服餘親則葬訖除之有五穀牛

猪雞多不火食厥田下濕人皆山居有巨粟每以四仲  
之月王祭天及五帝之神立其始祖仇台廟於國城歲

四祠之

仇台為遼東太守公孫度之婿

新羅國

在高麗東南漢樂浪郡之地

其人雜有華夏其文字甲兵同

於中國選人壯健者悉入軍烽戍邏俱有屯營部伍風  
俗政刑衣服畧與高麗百濟同每正月旦相賀王設宴  
會班賚羣官其日拜日月神至八月十五日設樂令官  
吏射賞以馬布其有大事則聚羣官詳議而定之服色

尚素婦人辮髮繞頭以雜綵及珠為飾髮甚長美婚嫁之禮惟酒食而已輕重隨貧富新婚之夕女先拜舅姑次即拜夫死有棺斂葬起墳陵王及父母妻子喪持服一年田甚良沃水陸兼種其五穀果菜鳥獸物產畧與華同

靺鞨國

在高麗之北

肅慎之苗裔也所居多依山水其俗相

與耦耕土多粟麥稔水氣鹹生鹽於木皮之上其畜多猪嚼米為酒飲之亦醉婦人服布男子衣猪狗皮俗以

溺洗手面於諸夷最為不潔其俗淫而妬其妻外淫人有告其夫者夫輒殺妻殺而後悔必殺告者繇是姦淫之事終不發揚人皆射獵為業角弓長三尺箭長尺有二寸常以八九月造毒藥傅矢以射禽獸中者立死

黑水靺鞨俗皆編髮性凶悍無憂戚貴壯而賤老無屋宇並依山水掘地為穴架木於上以土覆之狀如中國之冢墓相聚而居夏則出隨水草冬則入處穴中父子相承世為君長俗無文字兵器有角弓及楛矢其畜宜



猪富人至數百口食其肉而衣其皮死者穿地理之以身襯土無棺斂之具殺所乘馬於屍前設祭

振國本高麗其地在營州之東二千里南接新羅西接越喜靺鞨東北至黑水靺鞨地方二千里編戶十餘萬兵數萬人風俗與高麗及契丹同頗有文字及書記

流求國

居大海之西  
當建安之東

男女皆以白苧繩纏髮從項後盤

繞至額其男子用鳥羽為冠裝以珠貝飾以赤毛形製不同婦人以羅紋白布為帽其形正方織鬪縷皮并雜

色紵及雜毛以為衣製裁不一綴毛垂螺為飾雜色相  
間下垂小貝其聲如珮綴璫施釧懸珠於頸織藤為笠  
飾以毛羽有刀稍弓箭劍鉞之屬其處少鐵刃皆薄小  
多以骨角輔助之編紵為甲或用熊豹之皮王乘木獸  
令左右輦之而行導從不過數十人小王乘機鏤為獸  
形國人好相攻擊人皆驍健善走難死而耐創諸洞各  
為部隊不相救助兩陣相當勇者三五人出前跳踈交  
言相罵因相擊射如其不勝一軍皆走遣人致謝即共

和解收取鬪死者共聚而食之仍以其髑髏將向王所  
王則賜之以冠使為隊帥無賦歛有事則均稅用刑亦  
無常惟皆臨事科決犯罪皆斷於烏了帥

日本官名

不伏則

上請於王王令臣下共議定之獄無枷鑲惟用繩縛決  
死刑以鐵錐大如筋長尺餘鑽頂而殺之輕罪用杖俗  
無文字望月虧盈以紀時節候草榮枯以為年歲人深  
目長鼻頗類於胡亦有小惠無君臣上下之節拜伏之  
禮父子同牀而寢男子拔去髭鬚身上有毛之處皆亦

除去婦人以墨點手為虫蛇之文嫁娶以酒餽珠貝為聘或男女相悅便相匹偶婦人產乳必食子衣產後以火炙令汗出五日便平復以木槽中暴海水為鹽木汁為酢釀米麪為酒其味甚薄食皆用手偶得異味先進尊者凡有宴會執酒者必待呼名而後飲上王酒者亦呼王名銜盃共飲頗同突厥歌呼蹋蹄一人唱衆皆和音頗哀怨扶女子上膊搖手而舞其死者氣將絕輿至庭親賓哭泣相弔浴其屍以布帛纏之裹之以葦草

視土而殞上不起墳子為父者數月不食肉南境風俗少異人有死者邑里共食之有熊羆豺狼尤多豬雞無牛羊驢馬厥田良沃先以火燒而引水灌之持一插以石為刃長尺餘濶數寸而壑之土宜稻粱禾黍麻豆赤豆胡豆黑豆等木有楓栝樟竹松梗楠杉梓藤果藥同於江表風土氣候與嶺南相類俗事山海之神祭以酒饋鬪戰殺人便將所殺人祭其神或依茂樹或起小屋或懸髑髏於樹上以箭射之或累石繫幡以為神主王

之所居壁下多聚髑髏以為佳人間門戶上必安獸頭骨角

倭奴國在新羅東南水陸三千里居大海之中東西五月行南北三月行常與中國通其俗有文字敬佛法初跣足以幅巾蔽其節後推髻無冠帶隋煬帝時始賜衣冠今以錦綵為冠飾裳皆施襪綴以金玉其衣服之製頗類新羅然以文布為之腰佩銀花長八寸左右各數枚以明貴賤等級

日本國

言國近於日

古倭國之別種也國在新羅東南大海

中出紙緊滑如璽紙其王阿每氏文字與中國同唐高宗永徽五年獻琥珀大如斗瑪瑙大如五升器與新羅相接其琥珀在海中涌出又與蝦夷國相隣

交趾國人如禽獸男女同川而浴長幼無別項髻徒跣以布貫頭而著之後頗徙中國罪人使雜居其間乃稍知言語漸見禮化後漢光武中興錫光為交趾任延守九真於是教其耕稼制為冠履初設媒娉始知婚娶建

立學校導之禮義

噉人國在交趾西所生首子輒解而食之謂之宜弟味

旨則以貢其君君喜而賞其父取妻美則讓其兄今烏

澣人是

南州異物志曰烏澣地名也今漢川之南交趾之北常出道間有保行旅輒出擊之利得人食

之不貪其財貨並以其肉為餚死鬪體破之以飲酒以人掌趾為珍異以食長者

林邑國古越裳之地上多香水金寶物產大抵與交趾同以埽城蜃灰塗之東向戶其國有金山石皆赤色其中生金金夜則出飛狀如螢火又出螭蜃貝齒吉貝沉



木香吉貝者樹名也其華成時如鵝毳抽其緒紡之以作布潔白與紵布不殊亦染成五色織為班布也沉木香者土人所斷之積以歲年朽爛而心節獨在置水中則沉故名曰沉香次不沉不浮者名曰窠香也其俗皆開北戶以向日至於居止或東西無定人性凶悍果於戰鬪便山習水不開平地四時暄暖無霜雪人皆裸露徒跣以黑色為美貴女賤男同姓為婚婦先聘婿女嫁之時著迦藍衣横幅合縫如井闌首戴寶花居喪翦髮

謂之孝燔尸中野以為葬其王服天冠被纓絡每聽政子弟侍臣皆不得近之又云其王戴金花冠形如章甫衣朝霞布珠璣瓔珞足躡革履時服錦袍良家子侍衛者二百許人皆執金裝刀有弓箭刀槊以竹為弩傳毒於矢樂有琴笛琵琶五弦頗與中國同每擊鼓以警衆吹蠶以即戎其人深目高鼻髮拳色黑俗皆徒跣以幅布纏身冬月衣袍婦人椎髻施椰葉席嫁娶必用八月女先求男由賤男而貴女同姓還相婚姻每有婚媾令

媒者齋金銀釧酒二壺魚數頭至女家於是擇日夫家  
會親賓歌舞相對女家請一大姓號婆羅門送女至男  
家婿盥手因牽女授之呪曰吉利吉利為成禮寡婦孤  
居散髮至老王死七日而葬有官者三日庶人一日皆  
以函盛屍鼓舞導從輿至水次積薪焚之收其骨王則  
納金甕中沉之於海有官者以銅沉之海口庶人以瓦  
送之於江男女皆截髮隨喪至水次盡哀而止歸則不  
哭每七日燃香散花復哭盡哀而止盡七七日而罷至

百日三年亦如之人皆奉佛文字同於天竺又云其王者著法服加纓絡如佛像之飾出則乘象吹螺擊鼓罩吉貝織以吉貝為幡旗國不設刑法有罪者使象蹋殺之國王事尼乾道鑄金銀人像大十圍

扶南國西南去林邑三千餘里出金銀銅錫沉香象犀孔翠五色鸚鵡俗本裸文身被髮不製衣裳以女人為王人皆醜黑拳髮性質直不為寇盜以耕種為務一歲種三歲穫又好雕文刻鏤食器多以銀為之貢賦以

同林邑又云百姓以蕉蔗龜烏為禮國法無牢獄有訟者先齋三日乃燒斧極赤令訟者捧行七步又以金環若雞卵投沸湯中令採取之若無實者手即爛有理者則不又於城溝中養鰐魚門外圈猛獸有罪者輒以餒猛獸及鰐魚獸不食為無罪三日赦之鰐大者長二丈餘狀如鼉有四足喙長六七尺兩邊有齒利如刀劍嘗食魚遇得獐鹿及人亦噉之蒼梧以南及外國皆有之

吳時遣中郎康泰宣化從事朱應使於其國國人猶裸  
惟婦人著貫頭泰應謂曰國中實佳但人褻露可怪耳  
尋使令國內男子着橫幅今干澆也大家乃截錦為之  
貧者乃用布

毗騫國去扶南八千里俗有室屋衣服噉粳米其人言  
語小異扶南有山出金金露生石上國法刑人並於王  
前噉其肉國內不受估客有往者亦殺而噉之是以商  
旅不敢至王常樓居不血食不事鬼神其子孫生死如

常人惟王不死扶南王數使與書相報荅嘗遺扶南王  
純金五十人食器形如圓盤又如瓦堰名為多羅受五  
升又如椀者受一升王亦能作天竺書書可三千言語  
其宿命所由與佛經相似並論善事又傳扶南東界即  
大漲海海中有火洲洲上有諸薄國國中有馬洲復東  
行漲海千餘里至自然火洲其上有草生火中洲左近  
人剥取其皮紡績作布以為手巾與蕉麻無異而色微  
青黑若小垢澇則投火中復更精潔或作燈炷用之不

知盡

頓遜國在林邑西南海崎上地方千里城去海十里有  
五王並羈屬扶南土地洿下而平博氣候風俗大較與  
林邑同東界通交州諸賈人其西界接天竺安息徼外  
諸國往還交易其市東西交會日有萬餘人珍物寶貨  
無所不有又有酒樹以安石榴采其花汁貯瓮中數日  
成酒可飲

真臘國在林邑西南本扶南之屬國習俗文字與婆羅



門同居處器物頗類赤土以右手為淨左手為穢每日  
澡洗以楊枝淨齒讀誦經呪又噪灑乃食食罷還用楊  
枝淨齒又讀經呪食多蘇酪砂糖粳粟米餅欲食之時  
先取雜肉羹與餅相和手濡而食娶妻者惟送衣一具  
擇日遣媒人迎婦男女二家各八日不出晝夜燃燈不  
息男婚禮畢即與父母分財別居父母死小兒未婚者  
以餘財與之若婚畢財物入官其葬男女皆七日不食  
剔髮而哭僧尼道士親故皆來聚會音樂送之以五香

木燒屍收灰以金銀瓶盛送於大水之中貧者或用瓦  
而以彩色畫之亦有不焚送屍山中任野獸食者其北  
多山阜南有水澤地氣尤熱無霜雪饒瘴癘毒虫土宜  
梁稻少黍粟果菜與日南九真相類異者有婆娑樹  
無花葉似柿實似冬瓜菴羅樹花葉似棗實似李毗野  
樹花似木瓜葉似杏實似楮婆田羅樹花葉實並似棗  
而小異歌畢佗樹花似林檎葉似榆而厚大實似李其  
大如升自餘多同九真海中有魚名建同四足無鱗其

鼻如象吸水噴高五六十尺有浮胡魚其形似鮠背如鸚鵡有八足多大魚半身出水望之如山每五六月中毒氣流行即以白猪白牛白羊於城西門外祠之不然者五穀不登六畜多死人衆疾疫近都有陵伽鉢婆山上有神祠每以兵二千人守衛之城東有神名婆多利祭用人肉其王年別殺人以夜祀禱亦以守衛者十人其敬鬼如此多奉佛法尤信道士佛及道士並立像於館非王正妻子不得為嗣王初立之日所有兄弟並

刑殘之或去一指或劓其鼻別處供給不得仕進王三  
日一聽朝坐五香七寶牀上施寶帳其帳以文木為竿  
象牙金鈿為壁狀如小屋懸金光焰有同於赤土前有  
金香爐二人侍側王着朝霞古貝瞞絡腰腹下垂至脛  
頭戴金寶花冠被其珠纓絡足履革屣耳懸金璫身服  
白疊以象牙為屨若露髮則不加纓絡臣人服製大抵  
相類其俗東向開戶以東為上有戰象五十頭尤好者  
許以飯肉與隣國戰則象隊在前於背上以木作樓上

有四人皆持弓箭

訶陵國在真臘之南其王所居豎木為城造大屋重閣覆以椽櫚皮王所坐之牀悉以象牙為之亦以象牙為席食不用匙箸以手撮之以椰樹花為酒飲之亦得醉有山穴每涌而出鹽國人取之以食其國別有毒女人與常人同止宿即令人身上生瘡與之交會即致死若涎液霑着草木即枯其人身死不臭亦不爛

冊府元龜卷九百五十九

欽定四庫全書

冊府元龜卷九百六十

宋 王欽若等 撰

外臣部

土風第二

墮婆登國在林邑南其風俗與訶陵畧同種稻每月一熟亦有文字書之貝多葉其死者口實以金又以金釧貫於四肢然後加以婆律膏及檀沉龍腦等香積薪以燔之

殊奈國在林邑南去交阯海行二月餘日習俗文字與  
婆羅門同絕遠未嘗朝中國唐貞觀初始通

盤盤國在林邑西南海曲中人皆學婆羅門書甚敬信  
佛法

婆利國在林邑東南海中洲上去廣州二月日行國界  
東西五十日行南北二十日行有一百三十六聚土氣  
暑熱如中國之盛夏穀一歲再熟草木常榮海出文螺紫  
貝有石名蚌貝羅初採之柔軟及刻削為物乾之遂大

堅強其國人披吉貝如帔及為都縵王乃用斑絲布以  
瓔珞繞身頭著金冠高尺餘形如弁綴以七寶之飾帶  
金裝劍偏金高坐以銀蹬支足侍女皆為金花雜寶之  
飾或持白毼拂及孔雀扇王出以象駕輿輿以雜香為  
之上施羽蓋珠簾其導從吹螺擊鼓問其先及年數不  
能記焉而言白淨王夫人即其國女也又云其地延袤  
數千里國人善投輪其大如鏡中有竅外鋒如鋸遠  
以投人無不中其餘兵器與中國畧同俗類真臘物產



同於林邑其殺人及盜截其手姦者鑱其足期年而止  
祭祀必以月晦盤貯酒餽浮之流水每十一月必設大  
祭海出珊瑚有鳥名舍利解人語人皆黑色穿耳附璫  
王戴花冠形如皮弁裝以真珠瓔珞身坐金牀侍女有  
金花寶鏤之飾或持白旄拂孔雀扇行則駕象鳴金擊  
鼓吹蠡為樂男子皆拳髮被吉貝布橫幅以遶腰有吉  
貝草緝其花以作布麓者名吉貝細者名白疊

陀洹國在墮和羅西北其國海行五月至廣州土無蠶

桑以白疊朝霞布為衣五穀皆稻麥麻豆獸有白象猪  
羊牛俗皆屋居其父母死停喪在室輒數日不食燔屍  
已後男女並剔頭臨池洗浴然後進食

狼牙修國在南海中其界東西三十日行南北二十日  
行去廣州二萬四千里土氣物產與扶南畧同偏多篠  
沈婆律香等其俗男女皆袒而被髮以吉貝為干縵其  
王及貴臣乃加雲霞布覆胛以金繩為絡帶金鑲貫耳  
女子則披布以瓔珞繞身其國以黑磚為城重門樓閣

王出乘象有幡旄旗鼓罩白蓋兵衛甚嚴

干陀利國在南海洲上其俗與林邑扶南畧同出斑布吉貝檳榔檳榔特精為諸國之極

烏澗南方夷號也其俗食人以鼻飲水口中進噉如故赤土國本扶南之別種在南海中水行百餘日其俗皆穿耳翦髮無跪拜之禮以香油塗身其俗敬佛尤重婆羅門婦人善髻於項後男女通以朝霞朝雲雜色布為衣豪富之室恣意侈靡為金鎖非王賜不得服用每婚

嫁擇吉日女家先期五日作樂飲酒父執女手以授婿  
十日乃配焉既娶即分財別居惟幼子與父同居父母  
兄弟死則剔髮素服就水上構竹為棚棚內積薪以屍  
置上燒香建幡吹蠶擊鼓以送之縱火焚薪遂落於水  
貴賤皆同惟國王燒訖收灰貯以金瓶藏於廟屋冬夏  
常濕雨多霽少種植無時特宜稻稌白豆黑麻自餘物  
產多同於交趾以甘蔗作酒雜以紫瓜根酒色黃赤味  
亦香美亦以椰漿為酒

斯調國有火洲在南海中其上有野火春夏自生秋冬  
自死而有木生於其中而不消也枝皮夏活秋冬死則  
皆枯瘁其俗嘗冬採其皮以為布色小青黑若塵垢汚  
之便投火中則更鮮明也

崑崙之墟有炎火之山山上  
有鳥獸草木皆生於炎火之

中故有火浣布非此山草  
木之皮則其鳥獸之毛也

大食國在南海中其國男夫黑色多鬚鼻大而長似婆  
羅門婦人白皙亦有文字出駝馬驢騾殺羊等其馬大  
於諸國兵力勁利其俗勇於戰鬥好事天神而土多沙

石不堪耕種惟食駝馬等肉俱紛摩地那山在國之西國南隣於大海其王移穴中黑石寘之於國

占城國其衣服制度大畧與大食國同所乘皆象馬粒食稻米肉食水兕山羊之類獸之奇者有犀牛禽之大者有孔雀

長真國烏武獠也其地多毒物饒瘴癘其中毒者皆口噤不得餌藥故多自鑿去齒亦稱鑿齒之民焉

狎狎蠻地多雨潦俗好巫鬼禁忌寡畜產又無蠶桑故

其郡最貧句町縣有枕榔木可以為麵百姓資之

枕榔木外

皮有毛似枳櫚而散生其木剛作鋸鋤利如鐵中石更利惟中蕉根乃致敗耳皮中有似搗稻米片又似麥麵中作餅餌廣志曰枕榔樹大四五圍長五六丈洪直旁無枝條其顛生葉不過數十似搜葉破其木肌堅難傷入數寸得麵赤黃

又云土氣鬱熱多霖雨稻粟再熟無

徭役惟征戰之時乃相屯聚刻木為契其法劫盜者三倍還贓殺人者出牛馬三十頭乃得贖死以納死家風俗物產畧與東謝同

邛都夷漢武帝以為越雋郡其土地平原有稻田青蛉

縣馬同山有碧雞金馬光景時時出見

馬同山在今褒州揚波縣王褒

碧雞頌曰持節使王褒謹拜南崖敬移金精神馬縹碧之雞處南之荒深谿回谷非土之鄉歸來漢德漢德無疆康平唐虞澤配三皇華陽國志曰碧雞光景人多見之前書音義曰金形似馬碧形似雞也俗多遊

蕩而喜謳歌略與牂狗相類豪帥放縱難得制御

柞都夷漢武帝所開以為柞都縣其人皆被髮左衽言

語多好譬類居處畧與汶山夷同土出長年神藥仙人

山圖所居焉

哀牢驃人皆穿鼻僂耳其渠帥自謂王者耳皆下肩三



寸庶人則至肩而已土沃美宜五穀蠶桑知染采文繡  
罽毼帛疊蘭干細布織成文章如綾錦有梧桐木華績  
以為布幅廣五尺潔白不受垢汙先以覆亡人然後服  
之其竹節相去一丈名曰濮竹出銅鐵鉛錫金銀光珠  
虎魄水晶琉璃軻蟲蚌珠孔雀翡翠犀象猩猩豹獸雲  
南縣有神鹿兩頭能食毒草

冉駹夷其王侯頗知文書而法嚴重貴婦人黨母族死  
則燒其尸土氣多寒在盛夏冰猶不釋故夷人冬則避

寒入蜀為傭夏則違暑反其邑衆皆依山居止累石為室高者至十餘丈為邛籠又土地剛鹵不生粟穀麻菽惟以麥為資而宜畜牧有旄牛無角一名童牛肉重千斤可為旄出名馬有靈羊可療毒又有食藥鹿鹿麋有胎者其腸中糞亦可療毒又有五角羊麝香輕毛毳雞

牲牲

毳雞似雉而大青色有毛鬪敵死乃止

其人能作旄氈斑罽青頓宅

毳羊羴之屬

青頓毳羴並未詳字書無此二字周書伊尹為四方獻令曰正西崑崙狗國鬼親枳

已闡茸貫甸雕題離丘漆齒請令以丹青白旄純罽龍角神龜為獻湯曰善何承天纂文曰純氈罽音卑疑

反芘即  
紕也

特多雜藥地有鹹土煮以為鹽麇羊牛馬食之

皆肥

東謝蠻在黔安之東地方千里其俗無文書惟刻木為  
約巢居谷飲刀劍不離其身頭冠熊皮披猛獸之革

西趙蠻在東謝蠻之南其風俗物產與東謝同

悉立國在吐蕃西南戶五萬勝兵五萬人其地有城邑  
村落咸依谿澗男人以繪綵纏頭衣氈褐婦人以辮髮  
著短褐婚姻簡畧不行財貺以蒸報為俗畜多水牛殺

羊雞豕穀宜杭稻麥豆饒甘蔗諸果死者葬於中野不封不樹喪制以黑為衣一年就吉刑有刑劓羈事吐蕃

自古未通中國

唐貞觀二十年遣使獻方物

東女國西羌之別種在雅州西北風俗寬緩人性馴良其主及諸官皆奕葉相傳十一月為歲首死者墓而不墳豎為標記無喪紀之禮所居起重樓層屋王至九層國人至六層其王服青毛綾裙下領衫上披青袍其袖委地冬則羔裘飾以文錦為小鬟髻飾之以金耳垂璫

足履鞮釋俗重婦人而輕丈夫文字同於天竺每至十月令巫者齋楮詣山中散糟麥於空大呪呼鳥俄而有鳥如雞飛入巫者之懷因剖腹而視之每有一穀來歲必登若有霜雪必多災異其俗信之名為鳥卜其居喪服飾不改為父母喪則三年不櫛沐貴人死者或剥其皮而藏之納骨於瓶中糝以金屑而埋之國王將葬其大臣親屬殉死者數十人

昆明夷部落在黔州西南三千里山路險阻住止高欄

亦有羊馬其俗椎髻跣足首領披虎皮下者披氍

獠者南蠻之別種也自漢中達筇笮川洞之間所在皆有種其俗多散居山谷不辨姓氏又無名字所生男女惟以長幼次第之其丈夫稱阿暮阿段婦人阿夷阿等之類皆其語之次第稱謂也喜則羣聚怒則相殺雖父子兄弟亦手刃之迭相掠賣不避親戚被賣者號叫不服竄逃避之乃將買人指為捕逐若追亡叛獲便縛之但經被縛者即服為奴隸不敢更稱良矣俗畏鬼神尤

尚淫祀巫祝有賣其昆季妻孥盡者乃自賣以供祭焉  
往往推一首帥為主亦不遠相統攝自江左及中州遽  
有巴蜀多恃險不賓後周太祖平梁益之後令所在撫  
慰其與華民雜居者亦頗從賦役然天性暴亂旋致擾  
動每歲命隨近州鎮出兵討之獲其口以充賤隸謂之  
為壓獠焉

南平獠地與智渝南涪四州相接部落四千餘戶土氣  
多瘴癘山有毒草沙虱蝮蛇人並樓居登梯而上號為

欄干男子左衽露髮徒跣婦人橫布兩幅穿中而貫其  
首名為通裙其人美髮為髻髮垂於後以竹筒如筆長  
三四寸斜穿其耳貴者亦有珠璫土多女少男為婚之  
法女氏必先貨求男族貧人無以嫁女多賣與富人為  
婢俗皆婦人執役

松外蠻在西洱河其土有稻麥粟豆種菽亦與中國同  
而以十二月為歲首菜則葱韭蒜菁果則桃李柰有絲  
麻女工蠶織之事出純絹絲布麻幅廣七寸染色有緋



帛蠶以正月生三月熟畜有馬牛豬羊雞犬飯用竹筍  
搏之而噉羹用烏桕形若雞彝有船無車男子以氈及  
皮為帔女子絕布為裙衫仍披氈皮以帔頭髻有髮一  
盤而成形如髻男女皆跣至於死喪哭泣棺槨襲斂無  
不畢備三年之內穿地為坎殯於舍側上作小屋三年  
之後出而葬之以蠶蚌封棺令其耐濕豪富者殺馬牛  
祭祀親戚必會皆齋牛酒助焉多者至數百人父母皆  
斬衰布衣不澡遠者至四五年近者二三年然後即吉

其被人殺者喪主以麻括髮而墨面衣服不緝雖服內不廢婚嫁娶妻不避同姓富室娶嫁金銀各數十兩馬牛羊皆數十頭酒數十瓶女之所齋金銀將徒亦稱是婿不親迎女至其家亦有拜謁尊卑之禮其俗有盜竊殺人淫穢之事尊長即立一長木為擊鼓警共會其下強盜者衆共殺之若賊宗富強但燒其屋宅奪其田業而已不至於死穿窬盜者九倍徵贓處女孀妻淫泆不坐有夫而淫男女俱死男子不跨有夫女子之衣若姦

淫之人其族强者輸金銀請和妻則棄之其兩殺者死  
家族即報復力不能敵則授其部落舉兵相攻之

驃國西當極遠之地其俗有君臣長幼之序好生惡殺  
其土宜菽粟稻梁無麻麥其理無刑名桎梏之具犯罪  
者以竹五本束之復犯者撻其背數止五輕者止三殺  
人者戮之男女七歲則落髮止寺舍依桑門至二十不  
悟佛理乃復長髮為居人其衣服悉以白氊為朝霞繞腰  
而已不衣繒帛云出於蠶為其傷生也唐貞元中來獻

其國樂凡十曲與樂工三十五人來朝樂曲皆演釋氏  
經論之詞意

西域且末國治且末城有蒲萄諸果西域自且末以往  
皆種五穀土地草木畜產作兵畧與漢同至梁號末國  
勝兵萬餘戶土人翦髮著氍帽小袖衣為衫則開頸而  
縫前多牛羊驢騾

于闐國在且末西北多玉石

玉石玉之璞也一曰石之似玉也

又云地

多有水潦沙石氣溫宜稻麥蒲桃有水出玉名曰玉河

國人善鑄銅器其治曰西山城有屋室市井菓蔬菜蔬  
與中國等尤信佛法王所居室加以朱畫王冠金幘如  
金胡公帽與妻並坐接客國中婦人皆辮髮衣裘袴其  
人恭敬相見則跪其跪則一膝至地書則以木為筆札  
以玉為印國人得書戴於首而後開札一說城南五十  
里有贊摩寺者云是羅漢比丘比盧旃所造石上有辟  
支佛徒跣之跡于闐西五百里有比摩寺云是老子化  
胡成佛之所俗無禮義多賊盜淫縱王錦帽金鼠冠妻

戴金花其王髮不令人見俗云若見王髮年必儉土多  
麻麥粟稻五菓多園林

噉噉國在于闐之西本王舍城城中多寺塔皆飾以金  
風俗與突厥畧同其俗有兄弟共娶一妻夫無兄弟者  
其妻戴一角帽若有兄弟者依其多少之數更加角帽  
馬衣服加以瓔珞頭皆翦髮其語與蠕蠕高車及諸胡  
不同無城邑依隨水草以氍為屋夏遷涼土冬逐煖處  
分諸妻各在別所相去或二三百里其王巡歷而行

每月一處冬寒之時三月不徙其國無車有輿多駝馬  
用刑嚴急偷盜無多少皆腰斬盜一責十死者富豪累  
石為藏貧者掘地而埋隨身諸物皆置塚內其人凶悍  
能戰鬪西域康居于闐沙勒安息及諸小國三十許皆  
役屬之

朱居國在于闐西其人山居有麥多林果咸事佛語與  
于闐相類焉

太平國在于闐國南其人辮髮羶裘畜牧為業地多風

雪冰厚丈餘所出物產頗與吐蕃同俗無文字但刻木  
結繩而已刑法嚴峻其酋豪死抉出其腦實以珠玉割  
其臧易以黃金假造金鼻銀齒以人為殉卜以吉辰藏  
諸巖穴他人莫知其處多殺犛牛羊馬以克祭禮葬畢  
服除

渴盤陀國于闐西小國也風俗與于闐相類衣吉貝布  
着長身小袖袍小口袴地宜小麥資以為糧多牛馬駱  
駝羊等出好氍毹文字同於婆羅門



鉢和國在渴盤陁西其土尤寒人畜同居穴地而處又  
有大雪山望若銀峯其人惟食餅麵飲麥酒服氈裘  
波知國在鉢和西南土狹人貧依託山谷有三池傳云  
大者有龍王次者有龍婦小者有龍子行人經之設祭  
乃得過不祭多遇風雪之困

賒彌國在波知南山居不信佛法專事諸鬼神

烏耗國山居田石間有白草累石為室民接手飲

自高山下

谿澗中飲水故接連其手如猿之飲

出小步馬

小細也細步言其能蹠足即今所謂百步千跡者也

有驢無牛

西夜國與胡異其種類羌氏行國

言不土著也

隨畜產逐水

草往來

子合國土地出玉石一名漂沙地生白草有毒國人煎以為藥傳箭鏃所中即死

蒲犁國寄田莎車種俗與子合同

依耐國南與子合接俗相與同少穀寄田疏勒莎車

無雷國衣服類烏孫俗與子合同

難兜國種五穀蒲萄諸果有銀銅鐵作兵與諸國同屬

罽賓

罽賓國地平溫和有首宿雜草奇木檀櫟梓竹漆

櫟音懷即

槐之類也葉大而黑也

種五穀蒲萄諸果糞治園田地下濕生稻

冬食生菜其民巧雕文刻鏤治宮室織罽刺文繡好治

飲食有金銀銅錫以為器市列

市有列肆亦如中國也

以金銀為

錢文上為騎馬形湯下為人面形出封牛水牛象大狗

沫猴孔雀

犂牛頂上隆起者也郭義恭廣志云罽賓大狗如驢赤色數里搖執以呼之沫猴即彌

猴也珠璣珊瑚琥珀瑩琉璃

魏畧云大秦國出黑白赤黃青綠縹緋紅紫十種琉璃此

蓋自然之物采澤光潤踰於衆玉其色不常今俗所用皆銷冶石汁加以衆藥灌而為之尤虛脆不貞實非真

物

它畜與諸國同一說屬賓在葱嶺南踰懸度經熱坂

其地暑濕人皆乘馬土宜秔稻多甘蔗葡萄草木凌寒

不死尤信佛法南去舍衛國三千五百里至隋為漕國

國法嚴整殺人及盜賊者皆死其俗淫祠葱嶺山有順

天神者儀制極華金銀鍍為屋以銀為地祠者日有千

餘人祠前有一魚脊骨其孔中通騎馬出入國王戴金

魚頭冠坐金馬座土多稻粟豆麥饒象馬犇牛金銀鑛  
鐵氈氈朱砂青黛安息青木等香石蜜牛蜜墨鹽阿魏

白附子

烏弋山離國地暑熱莽平

有草莽而平坦

其草木畜產五穀果菜

食飲宮室市列錢貨兵器金珠之屬皆與罽賓同而有

桃拔獅子犀牛

桃拔一名符拔似鹿長尾一角者或為天鹿兩角者或為辟邪

俗重安

殺其錢獨文為人頭幕為騎馬以金銀飾仗

仗謂所持兵器也

條支國臨西海暑濕田稻有大鳥卵如甕又出獅子犀

牛犂牛孔雀

安息國治番兜城

番音盤

土地風氣物類所有民俗與烏

弋罽賓同亦以銀為錢文獨為王面幕為夫人面王死

輒更鑄錢有大鳥爵

大爵項似鷹身蹄似橐駝色蒼舉頭高八九尺張翅丈餘食大麥

其屬小大數百城地方數千里最大國也臨媯水商賈

車船行旁國書革旁行為書記

橫行為書記也今西方胡國及南方林邑之徒

書皆橫不直下革謂皮之不柔者

大月氏治監氏城

一作藍氏城

土地風氣物類所有民俗錢

貨皆與安息同出一封橐駝

春上有一封封者言其隆高若封土也

國本

行國也隨畜移徙與匈奴同俗後魏大武時其國人商販京師自云能鑄石為五色瑠璃於是採礦山中於京師鑄之既成光澤乃美於西方來者乃詔為殿容百餘人光色映徹觀者見之莫不驚駭以為神明所作自此國中琉璃遂賤人不復珍之

康居國與大月氏同俗東羈事匈奴

為匈奴所羈牽也

風俗及

人貌衣服畧同大宛地和煖饒桐柳葡萄多牛羊出好

馬

奄蔡國大畧與康居同俗

大宛國治貴山城土地風氣物類民俗與大月氏安息同大宛左右以葡萄為酒富人藏酒至萬餘石久者至

數十歲不敗俗者酒馬者首畜

者讀曰嗜

宛別邑七十餘城

多善馬馬汗血言其先天馬子也

大宛國有高山其山上  
有馬不可得因取

五色母馬置其下與集生駒  
皆汗血因號曰天馬子也

自宛以西至安息國雖頗

異言然大同自相曉知也其人皆深目多鬚髯善市賈



爭分銖貴女子女子所言丈夫乃決正其地皆絲漆不知鑄鐵器及漢使亡卒降教鑄作它兵器得漢黃白金輒以為器不為幣一說土宜稻麥其俗娶婦先以金同心指環為聘又以三婢試之不男者絕婚姦淫有子皆卑其母與人馬乘不調墜死者馬主出斂具

休循國治烏飛谷民俗衣服類烏孫因畜隨水草本故塞種也

捐毒國治行敦谷衣服類烏孫隨水草依葱嶺本塞種

也

莎車國有鐵山出青玉

阿鈎羌國在莎車西南土有五穀諸果市用錢為貨止立宮室有兵器土出金珠

波路國在阿鈎羌西北其地濕熱有蜀馬土平物產國俗與阿鈎羌同

小月氏國本大月氏之種在波路西南先居西平張掖之間衣服與羌同其俗以金銀錢為貨隨畜牧移徙亦

類匈奴

尉頭國治尉頭谷田畜隨水草衣服類烏孫

烏孫國地莽平多雨寒山多松楸

楸音武元切木名其心似松

不田

作種樹

樹植也

隨畜逐水草與匈奴同俗多馬富人至四

五十匹民剛惡貪狠無信多寇盜

悅般國在烏孫西北其風俗言語與高車同而其人清潔於胡俗翦髮齊眉以錦綉塗之昱昱然光澤日三澡漱然後飲食其國南界有火山傍石皆焦鎔流地數十

里乃凝堅人以為藥即石硫黃也

姑墨國北與烏孫接出銅鐵雄黃

溫宿國土地所有與鄯善諸國同

鄯善國本名樓蘭地沙鹵少田寄田仰穀旁國

寄於他國種田

又糴旁國之穀仰音牛向切

國出玉多葭葦檉柳胡桐白草

檉柳楊柳也白

草似莠乾時白色胡桐似桐

民隨畜牧逐水草有驢馬多橐駝能作

兵與婼羌同

婼音而遮切

婼羌國隨畜牧逐水草不田作仰鄯善且末穀

賴以自給也

山有鐵自作兵兵有弓矛服刀劍甲

服刀柏斲也柏音斲斲音伴又音陞

龜茲國在白山之南能鑄冶有鈇具刑法殺人者死劫

賊則折其臂并刖一足賦稅準地徵租無田者則稅銀

錢婚姻喪葬風俗物產與焉耆畧同惟氣候少溫為異

又出細氈麀皮氍毹饒沙鹽綠雄雌黃胡粉及良馬犂

牛等一說有城郭屋宇耕田產牧為業男女皆剪髮垂

與項齊惟王不剪髮學胡書及婆羅門書竿計之事尤

重佛法其王以錦蒙項著錦袍金寶帶坐金獅牀土多

稻粟菽麥饒銅鐵鉛安息香葡萄酒富室至數百石  
焉耆國在車師南近海水多魚其俗丈夫剪髮婦人衣  
襦著大袴婚姻同華夏好貨利任姦詭王有侍衛數十  
人皆倨慢無尊卑之禮小人貧無綱紀法令兵有弓刀  
甲稍婚姻畧同華夏死亡者皆焚而後葬其服制滿七  
月則除之丈夫剪髮以為首飾文字與婆羅門同俗事  
天神并崇信佛法尤重二月八日是日其國咸依釋教  
齋戒行道焉氣候寒土田良沃穀有稻麥菽粟畜有駝

馬牛羊養蠶不以為絲惟克綿續俗尚葡萄酒兼愛音  
樂南去十餘里有魚鹽蒲葦之饒

山國其山出鐵民山居寄田糴穀於焉者危須

西羌所居無常依隨水草地少五穀以產牧為業其俗  
氏族無定或以父名母姓為種號十二世後相與婚姻  
父沒則妻後母兄亡則納娉嫂故國無鰥寡種類繁熾  
不立君臣無相長一強則分種為酋豪弱則為人附落  
更相抄暴以力為雄殺人償死無他政令其兵長在山

谷短於平地不能持久而果於觸突以戰死為吉利病終為不祥堪耐寒苦同之禽獸雖婦人產子亦不避風雪性堅剛勇猛得西方金行之氣焉

湟中月氏胡被服飲食言語畧與羌同

章求拔國或云章揭拔本西羌種也在悉立西南居四山之內近代移出山西地接東天竺遂改衣服變西羌之俗因而附焉其地廣袤八九百里勝兵一千餘人居無城郭好為寇掠商旅患之



大秦國一名犁鞬在海西有松柏諸木百草人俗力田

作多種樹

樹植也

蠶桑皆髡頭而衣繡乘輜駟白蓋小車

出入擊鼓建旌旗幡幟所居城中有五宮其王日游一

宮聽事五日而後徧常使一人持囊隨王車人有言事

者即以書投囊中王至宮發省理其枉直各有官曹

文書置三十六將皆會議國事其王無有常人皆簡立

賢者國中災異及風雨不時輒廢而更立受放者甘黜

不怨其民人皆長大平正有類中國故謂之大秦土多

金銀奇寶有夜光璧明月珠駭雞犀

通天犀有一白理如綫者以盛米置

於羣雞中雞欲往啄米至輒驚駭故南人名之為駭雞犀

珊瑚琥珀琉璃琅玕朱丹

青碧刺金縷繡織成金鏤麝雜色綾作黃金塗火浣布又有細布或言水羊毳野蠶繭作之也合會諸香煎其汁以為蘇合丸外國諸珍異皆出焉以金銀為錢銀錢十當金錢一與安息天竺交市於海中利有十倍其人質直市無二價穀食常賤國用富饒隣國使到其界首者乘驛詣王都至則給以金錢終無盜賊寇警而道多猛

虎獅子遮害行旅不百餘人齎兵器輒為其所食又言  
有飛橋數百里可渡海北諸國所生奇異玉石諸物譎  
怪多不經故不記一說大秦國出細絺織成細布言用  
水羊毳名曰海西布此國六畜皆出水或云非獨用羊  
毛也亦用木皮或野蠶絲織成氍毹音瞿毼音榻罽  
帳之屬皆好其色又鮮於海東諸國所作也又嘗利得  
中國絲解之以為胡綾紋數與安息諸國交市於海中  
海水苦不可食故往來者希到其國中山出九色次玉

石一曰青二曰赤三曰黃四曰白五曰黑六曰綠七曰  
紫八曰紅九曰紺今伊吾山中有九色石即其類漢順  
帝陽嘉三年時疏勒王臣槃獻海西青石金帶各一又  
今西域舊國云屬賓條支諸國出琦石即次玉石也大  
秦多金銀銅鐵鉛錫神龜白馬朱髦駭雞犀璫瑁玄熊  
赤螭辟毒鼠大貝車渠瑪瑙南金翠爵羽翮象牙符采  
玉明月珠夜光珠真白珠琥珀珊瑚赤白黑綠黃青紺  
縹紅紫十種琉璃球琳琅玕玫瑰水精雄黃雌黃碧五色

玉黃白黑綠青紫紅絳紺黃金縹琉黃十種氍毹五色  
氍毹五色九色首下氍毹金縷繡雜色綾金塗布緋持  
布發陸布緋持渠布火浣布阿羅得布巴則布度代布  
温宿布五色桃布絳地金織帳五色斗帳一微木二蘇  
合狄提迷迷兜納白附子薰陸鬱金芸膠薰草木十二  
種香

册府元龜卷九百六十